

豫

章

焚

書

第二四〇册

豫

章

焚

書

臨川府志

皇明西江詩選卷之三

會稽韓陽選編

弋陽李奎校正

胡儼

字若思號頤庵南昌人洪武丁卯江西鄉貢進士仕至太子賓客國子祭酒

述古

圖書出河洛羲禹闡幽玄列聖繼有作人文日照宣
仲尼感鳳鳥至理寓微言自從秦漢來但見枝葉繁
寥寥千載後濂洛探其源紫陽具條理垂裕啟後昆
前脩去已遠來哲未有聞瑰辭逞葩艷寧復歸本根
蒼姬既訖錄炎劉勃以興詩書煨燼餘禮樂邈難徵

區區叔孫子莫能致兩生孝文過謙讓俗吏事章程
賈董失經紀二戴紊遺經遂令千載下擬述徒紛爭
二儀有定位八風無姦聲公旦去已遠萬世思典刑
屈子變風雅騷經寓孤忠光華並日月耿耿垂無窮
後賢襲軌轍長卿得其宗招搖臨邛市放曠託絲桐
溘風日以靡齊梁更繼穠遠遊謝紛濁超逸等冥鴻

雜詩

大化運無極四叙迭終始茫茫堪興問萬物羅戢看
青陽振其華玄冬拖根抵物理有盛衰人生貴知止
謙光乃自卑上善誠若水昧者徒紛紜達士甘竄訥

孰云楚翹翹損者滿之致

神龍絕嗜欲靜默藏深淵含和抱真陽珠光燭重玄
一朝吐雲氣甘澤沛九天天矯煙霧中變化出自然
孰知積精至造化爲控搏如何勞生者役役事多端
豈復念終始宇宙浩漫漫

倉庚鳴幽谷伐木正丁丁春風日載陽時聞求友聲
若有一介士掄揚稱達生對面抗高義中心藏甲兵
薰猶不同器申椒輒見憎巧言實亂德美色徒傾城
嗟哉同心友獨立何瑩瑩安得玉川子爲爾著門銘
長松生澗壑矯矯抗丹青根株蟠厚土雨露沃其條

蒼翠太古色超遙非一朝清風四時至白鶴千歲巢
如何燕雀羣喧啾乃見嘲矧彼山椒卉亦欲凌高標
嚴冬霜雪降氣類各已銷獨此歲寒姿青青終不凋

秋懷

大火已西下太白橫蒼蒼瑤階泣涼露玉簾含秋霜
冥鴻集華渚巢燕悲畫梁物理有代謝人心徒慨慷
何如廣成子憂樂永相忘

草蟲堵下鳴夜久猶未歇掩卷坐閱寥秋聲振林樾
人生知幾何憂來不可輟風吹浮雲開送我半窗月
逍遙步前庭孤螢自明滅

落葉走空堦涼飈度脩竹疎星澹長河白露下庭絳
遊子行未歸清砧動華屋感此悲歲年何由寄遐矚
丹丘倘有期舉手招黃鵠

東鄰有富姬窈窕艷粧束金縷錯舞衣錦衾爛華褥
那知西鄰女軋軋弄機軸終歲不下堂被服常不足
清尊有美酒錦囊有瑤琴酒以消離憂琴以暢徽音
涼颼天際來颼然飄我襟拂絃試一鼓引觴還獨斟
俛仰終永夕悠悠千載心

謁文丞相祠

大廈兮旣顛豈一木兮能全惟夫子兮遑遑莫不負

兮所天天茫茫兮曷訊彼覆餗兮何心志侘傺兮不
白淚浪浪兮盈襟脫虎口兮危疑羌中道兮失路風
塵兮瀕洞心鬱抑兮誰訴乘桴兮浮海波漫漫兮汪
洋渺霽脩兮何許雲冥冥兮山蒼蒼舉旗兮空坑期
王室兮再匡忽豺虎兮充斥嗟赤子兮流亡朱崖兮
景從義旅兮奮張何時運兮迫阨肆披猖兮見繫矢
死兮弗渝哀夷齊兮不食拘囚兮纍纍慷慨兮陳詞
從容兮就義日慘慘兮風悲遺祠兮巖宮儼肅肅兮
令容神逍遙兮八極驂白螭兮駕青龍流光兮天
地與造化兮焉窮

望居庸

望京都兮穹隆雄關峙兮居庸蒼翠兮蒙茸紛苒苒
兮清風城巍巍兮兩山臨玉塞兮跨高寒車麟麟兮
結駟風蕭蕭兮木葉殷淙懸崖兮珊珊悅鳴琴兮清
彈聞僊人兮昔降遺玉枕兮不刊召韓生兮肅之乃
顧余兮一粲駕黃鵠兮高飛翔薄層雲兮入霄漢皇
風暢兮八極蕩胡塵兮滅熄邀浮丘兮賦詩歌四海
兮寧一

過盧溝

洪流兮桑乾汨盤折兮溲灣架石梁兮橫波瀨濺濺

兮激湍白石兮齒齒際平沙兮浩漫攬余轡兮東馳
望天門兮九關雲飛飛兮來迎水冷冷兮山青回颺
度兮遠響生木蘂蘂兮鳥鳴聲余欲訊兮九河碣石
峙兮嵯峨渺滄海兮無極况凌風兮浩歌

續十二辰

鼯鼠飲河河不乾牛女長年相見難赤手南山縛猛
虎月中取兔天漫漫驪龍有珠常不睡畫蛇添足適
爲累老馬何曾有角生羝羊觸藩徒忿憤莫笑楚人
冠沐猴祝雞空自老林丘舞陽屠狗沛中市平津牧
豕海東頭

折楊柳歌

昨日看花開今日花已披苦心獨徘徊折楊柳流光
如逝波韶華詎能久

燕燕羽差池唧泥巢畫梁雙棲復雙飛折楊柳郎去
茂陵遊還憶閨中否

寶鏡久不磨塵翳如浮雲熒熒當奈何折楊柳中心
徒自知甯復論妍醜

四時詞

春風吹簾斜簾開飛柳花美人高堂上見此惜年華
年華容易隨春草一雙蛾眉鏡中老

碧水汎迴塘新荷艷曉粧看花臨綺檻愛此雙鴛鴦
鴛鴦宛轉迴塘路相對朝朝還暮暮

秋露白如玉梧桐墜寒綠文犀鎮錦帷紅淚消銀燭
銀燭輕搖翡翠煙孤影熒熒夜不眠

葉落深閨靜露零霄鶴警玉井凍無聲夢回寒夜永
夜永銅龍漏幽咽小窗斜轉梅花月

白紵歌

昨日之日不可留飛花迅速如波流嗟嗟少壯終白
頭願及芳時往遨遊吳姬當筵歌白紵清絲急管間
宮韶妙舞低回玉杯舉如何不樂空延佇堂前花開

艷春陽錦屏圍暖羅綺香搗鐘考鼓宴高張美人起
舞紅袖揚滿堂欣欣樂未央但恐一夕秋風涼空自
徘徊明月光

江南意

狂風吹游絲飄揚無定向若將比郎心郎心更搖颺
采采芙蓉花那能媚春華含晴照秋水孤芳徒自嗟

結髮行

少小爲夫婦結髮誓偕老如何中道間棄置不相保
抱恨匪良圖憂心徒燥燥世上應無連理枝堦下偏
生斷腸草殘粧收玉鏡幽意托瑤琴寂寞深閨裏誰

聽白頭吟

遠將歸

去年與郎別楊花飛白雪今年候郎歸楊柳綠依依
聞郎買船下湘渚日日門前望行人過盡乳鴉啼
徘徊日暮空延佇攬衣回洞房對鏡下新粧那知
清漏短但愛明月光月光照席涼於水帳裏燈花撒
紅蕊好事從來不浪傳明日升堂報姑喜

妾薄命

妾薄命聽妾歌夫婿輕別離妾心當柰何山有虎豹
水有蛟螭川塗邈悠曷云能來朔風吹衣雨雪霏霏

洞房潦慄神悽色衰吁嗟乎妾顏雖改兮妾心不移

竹枝詞

湖上聞郎歌竹枝湖中蓮艇便輕移却言郎渡瀟湘
去折得荷花空淚垂

船頭煙暝浪花飛船裏風來雨濕衣獨棹蘭橈下蓮
渚迎郎不見又空歸

荷葉亭亭秋色闌露珠風蕩不成團自憐顏色非前
日羞把新粧臨水看

楊柳枝詞

層畫樓前雨歇時千絲萬縷綠垂垂無端却被風吹

起撩亂春心不自持

罩水和烟萬葉重倚風飛絮曉茸茸莫教吹落長河
去化作浮萍無定踪

門外春風楊柳枝去年折柳送郎時車輪一去無消
息只有長條依舊垂

畫簾風動影絲絲曳綠搖金晝景遲睡起倚闌看蛺
蝶鶯聲只在最高枝

三臺詞

一陣霜風乍起半窗月影初斜寶匣燒殘香篆銀缸
落盡燈花

坐穩錦茵重疊醉來烏帽欹斜誰遣青娥闌月自憐
銀燭生花

次韻胡學士春日陪駕遊萬歲山

鳳輦宸遊日祥雲夾道紅香風傳別殿飛翠繞行宮
徑轉千巖合波迴一鏡空忽看鸞鶴起聲在半天中
澗道蒼苔合房櫺繡戶分碧淙晴欲雨錦石煖生雲
嘉樹千尋秀靈蒲九節分廣寒宮闕近天語半空聞
雨晴山色好太液暖浮春遊鯉遙吹浪飛花近着人
列筵深寵渥載筆煥絲綸願繼周南作騶虞詠至仁
閣道雲爲幄僊山玉作臺更無凡跡到只有異香來